



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tiryimyim@aolima



tir yimyim

TAPAK 7

**Delhi sorkari meshimetsür
1,300 nem skills training agütsür**

**UN tekolakbai Gaza aid convoy lendong
bushisüngdangtsü ajungshi**

VOL. XXI ISSUE NO. 139 (ADOK 139) DIMAPUR

KÜPTOKNÜ (SATURDAY)

METSÜREMI (MARCH) 02, 2024

₹ 5.00

NLA-i Assam Healing (Prevention of Evil) Practices Bill 2024 atema tebilemetsü abener

Kohima, March 1, 2024 (TYO): Assam Legislative Assembly nung tawa "Assam Healing (Prevention of Evil) Practices Bill 2024" agizükba atema Nagaland Assembly-i tebilemetsü abenba lemsatepogo.

"Nagaland nung alirtem sayutsüngitsü, külemtsü aser Khristan yimsü prokshitsü talenba kecha mali aser iba ya asenok Khristantem teimba ser aliba state asüba agi magi saka iba linük nung sensotem ama temeten angur. Constitution ajanga asenok nem Right to Freedom of Religion temeten agütsür" ta Deputy Chief Minister TR Zeliang-i ashi.

Assam State mesüra linük kübok tangalen alir asen külen Khristan adianutemi sayutsüngitsü, külemtsü aser Christianity prokshitsü atema temeten lir kechiyong parnok nem-a Constitution of India ajanga agütsüba kasa temeten agütsür" ta pai ashi.

Assam Healing (Prevention of

Evil) Practices Bill 2024 agizükba ajanga Assam nung secularism samaogo aser iba ya 'non-scientific healing practices' samatsütsü tenüng amer inyak. Iba ajanga Khristantem temulung yirutsüogo ta Zeliang-i ashi.

North-East India ya khenyongi balaka lir kechiyong tamangba yimsü aika meyoaktepa lir. Nagaland kübok Dimapur nung Hindu nungeri Deepavali o Durga Puja aser Muslim nungeri Bakr-Id kanga longsolongbena aser sademsadema amonger, ta paisa ashi.

Nagaland state sorkari ibala külemkujaba aser Hindu o Muslim nunger inyakyim menoktanger ta paisa ashi.

Assam Bill ajanga Assam nung Khristan missionary temi healing crusades mesüra healing practice noktanger aser iba ya Constitution nung agüja aliba Secularism tangatetba anema lir ta TR Zeliang-isa ashi.

"Christian Healing ya meimchirtem timtem balala atema aria bilema inyakba mapa ka lir

aser iba nung tamangba yimsü telemsa kecha mali. Secular aser democratic linük ka nung Tsüngremer temoatsütem ya Temple, Mosque, Gurudwara mesüra Church ka nung külemba den kasa ama agizüktsüla. Hinduism ajanga külemkujaba aser amongtsümong indang sayutsüngir, kasaji Christianity ajanga tamangertem dang Kümtetdakba Yisu Khrista tenüng nung shiranger asoshi sarasademtsü aser taneptsü agütsütsü sayutsüngir" ta pai metetdaksü.

Assam sorkari Assam Healing (Prevention of Evil) Practices Bill, 2024 meyipa agitsüla kechiyong iba ya India nung secularism tangatetba anema lir, ta TR Zeliang-isa ashi.

"India nung Secularism ajanga tamangba yimsü balala aliba ajitetba dang masü saka state sorkar ketdangsubaren nungi tamangba yimsü pila alitsü ashir. Anungji sorkari ashishitep aketba ozüngtem ajanga

sensotem indang religious freedom nung kongshira secularism lendong nung lir" ta LJP MLA Dr Sukhato A. Sema-i ashi.

"Nagaland nung Khristan tamanger 87.93% lir saka Nagaland-i kodanga tamangba yimsü bendanga mamshi mesüra NLA nung ozüng meyangludang. Onoki tamangba yimsü ajak nem religious freedom agütsür. Onoki Hindu nunger nem süngyanglu ayong nung enoktsü aser Muslim nungeri loud speakers amshia sarasademtsü melar" ta pai ashi.

Evangelist maparen balala Black Magic aser Evil Practices ta ashibaji kanga meshitak. Iba bill nungi Assam nung Naga Christians aika kümzüka ayutsü nüngdaker, ta Dr Sukhato-isa ashi.

"Iba Bill nung 'Magical Healing' ta amshia alibaji tim masü aser Khristantemi magizüker kechiyong taneptsü anguba ajak ya sarasadem ajanga Tanüla Temeshi ajanga agütsür" ta

Advisor aser NDPP MLA, Kudecho Khamo-ia ashi.

Anungji iba bill ajanga tamangba yimsü balala tsüngda tesempatep aser telemsa adokdaksütsü ta paisa ashi.

"Khristantem teimba ser aliba state ka ama Assam sorkar dang Khristantem sarasadem aser tamang ajanga kechi inyaker temelaba agütsütsü mepishir" ta BJP MLA & Minister Temjen Imna Along-ia ashi.

"Nagaland Legislative Assembly nung BJP MLA 12 lir aser kodang ibala ozüng yangludir state nung alirtemi onok aser BJP züngsem meyrjang aika dang tasüngdangba arur" ta Along-ia ashi.

"BJP MLA temi akokba tashi Assam sorkar den iba onük lemsateptsü. Taneptsü agütsüba ya putir, sayutsüngir mesüra evangelist kati agütsür masü saka Tsüngrem taochi ajanga taneptsü angur. Nüngdakbapuri taneptsü anguba nung aibelen kecha mali" ta Minister Along-isa shisem.

Nagaland Assembly-i Myanmar den arrtsü atema bangzüng ka renem

Kohima, March 1, 2024 (TYO): India sorkari Indo-Myanmar atsü dangtsüba aser Free Movement Regime (FMR) anentsü lemtetba magizüker ta Nagaland Assembly-i tanü bangzüng ka renemogo.

North Eastern state pezü-Arunachal Pradesh, Manipur, Mizoram aser Nagaland-i Myanmar den kilometre 1643 agi arrtsüa lir. Iba nung Nagaland-i kilometre 215 arrtsütepa lir.

Centre sorkar lemtet anema public, civil societies aser kin teloktemi noktakba atema Brihostibarnü NLA nung arrtsü atsü dangba aser FMR anenba indang onük benoka lemsatepdang

bangzüng ka renem.

India sorkar dang lemtet meyipa repringshitsü aser FMR agientsüba den Indo-Myanmar arrtsü atsü dangtsüba sentong agientsü mepishitsü atema NLA nung bangzüng renem.

Centre sorkari arrtsülen nisungtem senzüsenbongba ketdangtsütsü atema inyakyim kar latettsü aser iba system nung village council ketdangpurtem anioxtsü atema NLA-isa metetdaksü.

Centre lemtet ajanga alemli nungi arrtsü anatsülen aliba Naga nunger lokti, kin aser rongsenketzüng tesentaktep nung timtem agütsütsü ta NLA-isa bangzüngtep.

Nagaland sorkar mapa inyakerem regularized asütsü

Kohima, March 1, 2024 (TYO): Nagaland Assembly-i Hokolbarnü June 6, 2016 matongdang sanctioned posts nung contractual aser ad-hoc basis shimokertem regularize asütsü lemtetogo.

Iba nung gazetted aser non-gazetted government employees ajak dena lir.

CM Neiphu Rio-i "Regularisation of Employees in Group A & B Posts appointed prior to 6.6.2016" aser "Regularisation of Employees in Group C & D Posts appointed prior to 6.6.2016" bangzüng balala ana benokba sülen iba telemtetba agiogo.

"Nagaland ya Constitution nung ashiba ama welfare State ka lir sensotem nem rongsenketzüng tsütsü security agütsütsü tebilemetsü khuret lir" ta CM Rio-i ashi.

June 6, 2016 matongdang shimoker Group A & B employees aser gazetted sanctioned posts nung shimoker shirnok küm 10 inyakogo parnok ajak regularize asütsü atema February 9, 2024 nü Cabinet-i telemtetba agi, ta pai ashi.

Külen, group C & D posts nung inyaker regularize asütsüba ya February 9 nü lemtet, ta Rio-isa ashi.

June 6, 2016 matongdang sanctioned posts nung Group C & D employees shirnok contractual mesüra ad-hoc basis nung shimok aser küm 10 süiogo, parnok suitability test ka agia regularized asütsü atema one-time exercise ka alitsüla ta CM Rio-i ashi.

NLA Speaker Sharingain Longkumer-i bangzüngtem vote asütsü benok aser züngsemtemi voice vote ajanga agizük.

Rs 23727 crore Nagaland Budget 2024-25 agizükogo

Kohima, March 1, 2024 (TYO): Nagaland Legislative Assembly-i Hokolbarnü Budget 2024-25 agizükogo.

Neiphu Rio-i aniba opposition maliba sorkari bener aruba Rs 23727.87 crore Budget

voice vote ajanga agizüka liasü.

NLA-i Nagaland Appropriation (No. 2) Act, 2024 agizük aser iba ajanga sorkar nem Financial year 2024-25 atema Nagaland state Consolidated Fund nungi Rs

23727.87 agizüktsü tashi agütsür.

Chief Minister Neiphu Rio-i Bill benok aser Speaker Sharingain Longkumer-i vote agidang voice vote ajanga agizük.

State sorkari Foothill Road atema temulung agütsür: Minister Kaito Aye

Kohima, March 1, 2024 (TYO): Mon kübok Tizit nungi Peren kübok Khelma tashi kilometre 364 Foothill Road yanglutsü atema state sorkari tongti süa bilemer aser iba atema senotsü maneni bushir ta Roads and Bridges Minister G Kaito Aye-i ashi.

"Foothill Road ajanga state rongsenketzüng aser connectivity tajungba kümdaksütsü aser iba jagi state sorkari iba asoshi temulung agütsür aser akokba lenmang ajaklen nungi senotsü bushir" ta pai ashi.

State sorkari mezüng Ministry of Road Transport and Highways (MoRTH) dang iba lenmang ya National Highway ka kümdaksütsü asüngdang. Iba sülen taoba Minister MoRTH-i ashiba ama MoRTH indang Bharat Mala scheme kübok iba lenmang dendaksütsü asüngdang aser tatemsabubaji PM Gati Shakti kübok agütsü ta Minister Aye-i ashi.

2013-14 aser 2014-15 nung Special Plan Assistance (SPA) kübok iba lenmang asoshi Rs 67 crore agütsü aser 2021-22 nung state sorkari Rs 30 crore agütsü. Sen ajak meyoakteper Rs 97 crore

ajanga kilometre 128 nung formation cutting, culverts kar aser Doyang apu temdanga 134.80 m span RCC apu yanglu, ta pai ashi.

SPA anenba agi state sorkari MoRTH dang Foothill Road/ Trans-Nagaland Highway asoshi senotsü agütsütsü asüngdang. MoRTH-i "Consultancy Services for Feasibility Study and Detailed Project Report (DPR) for the Foothill Road from AmguriNH-61 to Niuland via Longhem-Changpang-Governor's camp" atema C.E. Testing Company Private Limited nem mapa lemkütsü, ta Minister Aye-isa ashi.

MoRTH aser Consultant tsüngda December 29, 2017 nü Contract Agreement agitep aser June 12, 2019 nü MoRTH nem final DPR agütsü. ADG (Zone V) menden ser December 26, 2018 nü alignment agizük, ta paisa shisem.

"Nagaland Chief Minister-i ashiba ama June 19, 2019 nü Union Minister MoRTH nem Aide Memoire agütsü aser idakji iba lenmang ya National Highway ka ama sangdongtsü ashi. Ajisüaka Minister MoRTH-i Chief Minister den senden amendang National Highway sangdongtsü ano

merenem anungji National Highway ama sangdongtsü makokba osang lemsatep" ta Minister Aye-i metetdaksü.

Nagaland CM-i August 3, 2023 nü Union Home Minister MoRTH den iba tongtipang onük lemsatep aser idangji Union Minister-i PM Gati Shakti kübok agütsütsü ashi.

Iba nungji ajemdaker state sorkari August 24, 2023 nü proposal agütsüogo. MoRTH aser PM Gati Shakti nem agütsüba proposal nung Khelma nungi Tizit tashi kilometre 364 Foothill Road ya Rs 9000 Crore endoka Upgradation asütsü shia lir, ta paisa ashi.

"Department of PWD(R&B)-i 2021 küm Foothill Road ya all weather single lane road akümttsü atema Rs. 142 crore meshi ajisüaka Rs 30 crore dang lemkütsü. Iba senji RCC-2 lane bridge, culverts kar, anentsüh aliba okdokba aser ali anenoka aiba tesemtem yangluba nung amshi" ta Minister-isa ashi.

Chief Minister-i kanga dang mulungsoa Rs.148.50 crore lemkütsüogo aser iba ya tang aliba fair-weather road nungi single lane all weather road yangluba nung amshitsü, ta paisa ashi.



Shisalen Riji Coaching Center semzükba aser tejangrartem asoshi orientation sentong ka March 1, 2024 nü Deputy Commissioner, Mokokchung indang Conference Hall nung agia liasü.

MLA Achumbemo-i state nung mijang atoba ozüing aser tajangzük indang asüngdang

Dimapur, Metsüremi/March 01 (TYO): Assembly Secretariat, Kohima nung 14 buba Nagaland Legislative Assembly indang session pezü buba tatembangba senden March 1, 2024 nü amendang state nung Coal Mining License agütsütsü terms of reference indang MLA Achumbemo Kikon-i asüngdangba langzüdang Coal Mining License angutsü atema documents ter nüngdaker, ta

Chief Minister & Minister-in-charge, Neiphu Rio-i ashi. Iba onük jembiba nung shilem agidang, nüngdakba conditions tem mabensai ozüing agi memelai state kübok tesem aika nung mijang ato tenzükogo, ta Kikon-i ashi aser scientific mining methods shidak aser ozüing tesashi sorkari yanglutsü ayongzükba liasü.

Pai mijang atoba nungi revenue ajema anguba aser 2022-2023 aser 2023-2024

tsüingta revenue gap tulu aliba indang asüngdanga liasü.

State nung 2022-2023 mapang Department-i mijang atoba nungi revenue nung sen 9,91,82,730 benden aser 2023-2024 mapang sen 3,41,42,645 benden ta ashir. Nagaland nung anguba mijang nung Sulphur kanga aliba ajanga jenjang tajemba akumer aser tajemba ajangzükba, ta Deputy Chief Minister T.R. Zeliang-i ashi.

(Maneni tapak 8 nung...)

Home Department nung constable atema open recruitment alitsü: Y Patton

Dimapur, Metsüremi/March 01 (TYO): 14th Nagaland Legislative Assembly indang session pezü buba tatem anogo, March 1, 2024 nü MLA Kuzholuzo Nienu-i Deputy Chieh Minister (Home), Yanthungo Patton dang Home Department kübok constables

shimba indang asüngdanga liasü. Iba indang metetnüba ama langzüdang, constables tem shimba maparen ya open recruitment ajanga shimtsü, ta Y Patton-i ashi.

Pai posts balala telemsa, posts kwi atema advertise asütsü aser eligibility criteria

indang tejangka osang agütsü. Constable shimba ya Constable (GD), Constable (MT) aser Constable (NPTO) telemsa nung shimtsü aser telemsa shia nübu kwi shimtsü, iba indang ano tatem kati maruteti tang teinyakdak lir, ta ashi.

(Maneni tapak 8 nung...)

DC & DEO Kohima aser EEM team senden ka amen

Dimapur, Metsüremi/March 01 (TYO): Taruba 18buba Lok Sabha General Election dak sendakba nung Deputy Commissioner & District Election Officer, Kohima-i ayongzükba Election Expenditure Monitoring Team ktdangsurtem den February 29

nü DC Office Conference Hall, Kohima nung senden ka menogo.

Senden nung Deputy Commissioner aser DEO Kohima, Kumar Ramnikant-i, ktdangsurtem dang election duty ya süoki ia agütsü aser iba ya tongtibasa agütsü mepeshiba

den election kecha tetsükdaktsü aser tebandang makai yimjung nung sunep sunepa agitettsü atema EEM Team dang Election Expenditure Monitoring handbook indang guideline tem kanga junga azüingsü mepeshia liasü.

(Maneni tapak 8 nung...)

DC & DEO Mokokchung-i Arms License alirtem dang metetdaksür

Dimapur, Metsüremi/March 01 (TYO): 18 buba Lok Sabha atema General Election agütsü aliba mechi Deputy Commissioner & District Election Officer, Mokokchung, Thsuvisie Phoji-i District nung Arms Rules indang rules 30 aser 112 nung aliba ama prangbong aser injang indang physical verification agütsü metetdaksüogö.

District nung tensa ajungtsü mechi iba totuyuba ya agütsü.

Anungji Mokokchung District kübok Arms License alir ajaki March 29, 2024 tashinung anepdang 9:00 ako nungi nikongdang 3:00 tsüingta anasatiba police station bushia prangbong/injang aser License booklet bener arutsü metetdaksür, ta sangdong ajanga ashi.

Police station indang officer-in-charge ajanga anogoshi osang excel format nung nüngdakba osang tejangja dener agütsütsü.

Iba osang nungya license indang kibur tenüing, License No, UIN No, type of Arms License No, License tesüsa renew asüba anogo aser injang kwi ali, itemji agütsütsü.



BPR&D, MHA kübok Nagaland Police ajanga New Criminal Laws asem - Bharatiya Nyaya Sanhita (BSN), Bharatiya Nagarik Suraksha Sanhita (BNSS) aser Bharatiya Sakshya Adhinyan (BSA), 2023 atema anogo pongu TOT course sentong ka Rhododendron Hall, Police Complex, Chümoukedima nung March 1, 2024 nü tenzükba liasü. Iba TOT course ya ASI nungi Addl, SP tashi police ktdangsur atema ayongzükba lir.

ULBs indang Electoral Rolls revision March 8 nungi tenzüktsü

Kohima, Metsüremi/March 01 (TYO): Nagaland nung aliba Urban Local Bodies (ULBs) 29 atema Electoral Rolls Summary Revision ya March 8, 2024 nungi tenzüktsü.

Hokulbarnü NLA nung MLA Kuzholuzo Nienu-i asüngdangba ka tezuluba nung langzüdang Advisor, Urban Development & Municipal Affairs, Zhaleo Rio-i iba osang ya metetdaksü.

House nung agütsüba telangzükba nungsa, State Election Commission ajanga

mapang atakzüktsüba ama final publication ya April 12, 2024 nung sangdongtsü, ta ashi.

ULBs 39 indang E-Roll tesüsa reprangshiba ya August 3 nungi November 24, 2022 mapang liasü aser iba ya Intensive Revision yimya nung January 1, 2022 ya qualifying date ama inyak, ta ashi.

ULBs indang E-Roll nung voters inoktsü aser indoktsü mapa ya March 11-20, 2024 anogotem Special Summary Revision mapang inyaktsü ta ashi.

Ex-PAN Executive Council senden ayonger

Dimapur, Metsüremi/March 01 (TYO): Ex-Parliamentarians Association of Nagaland (Ex-PAN) tir Joshua Sumi aser General Secretary Tarie Zeliang nati külem sangdong ka ajanga, Ex-Parliamentarians Association of Nagaland (Ex-PAN) Executive Council senden ka Honibar March 9 nü Nagaland Legislative Assembly guest house, Darogapathar, Dimapur nung

anüngdang 11:00 ako nungi tenzükba amentsü ta metetdaksüogö.

Iba senden ya 2024 küm atema mezüngbuba senden asütsü kong ketdangpurtem, Advisor tem aser Executive züngsemtemi (District representatives) shilem agütsü.

Iba dak sendakba nung tir aser Secretary nati züngsemtem ajak tamakok maludaktsüi arua shilem agütsü mepeshia metetdaksüogö.

Chümoukedima DC-i metetdaksür

Dimapur, Metsüremi/March 01 (TYO): Chümoukedima Deputy Commissioner-i sangdong ka ajanga, Majena Infra Project-i Vihoto yimtsüing nung Explosives rizüing ayutsü asoshi Magazine ka yanglutsü atema office dang NOC meshia lir, ta metetdaksüogö.

Explosive Rules 2008 Rule 103(3) (a) dak ajemdaker Office-i iba osang metetdaksür aser osang agütsüba sülen ita ka tsüingda (March 28, 2024) tashishi kar danga lira kuli densema tashishiba benoktsü DC-isa metetdaksüogö.

NBSE-i Heads of Institutions tasenpur den senden amentsü

Dimapur, Metsüremi/March 01 (TYO): Nagaland Board of School Education ajanga sangdong ka nung ashiba agi, 2023-2024 mapang shimba New Heads of Institutions (Secondary aser Higher Secondary levels) ajunga den senden ka March 14, 2024 anepdang 10:00 ako nungi tenzükba Kohima nung amentsü.

Heads of Institutions indang teinyaktsü aser mapa indang jembütsü aser Board indang temzüing ozüing tali tajungba nung angatetdaksütsü atema iba senden ya amentsü, ta sangdong ajanga ashi.

Anungji 2023-2024 mapang shimba New Heads of Institution ajunga dang iba senden nung adentsü asoshi March 8, 2024 tashinung metetdaksütsüla.

Danga Heads of Institutions nungi tejangrartem iba senden nung adentsü pelashishia jaoker. Iba senden nung shilem agütsü atema Google form <https://forms.gle/PhYP3SBQkQizDoXg9> nung osang agütsütsüla. Senden amentsü atema tesem ya mapang tatsüka lir Districts WhatsApp groups nung metetdaksütsü, ta sangdong ajanga ashi.

March 3 nü National Immunization Day amungtsü

Dimapur, Metsüremi/March 01 (TYO): National Immunization Day nung shilem ka ama Nagaland nunga district ajunga nung March 3, 2024 ya Polio Day amungtsü.

Iba anogo arishi küm pongu tekübok tanur ajak nem oral polio vaccine tzüjang ana-na agütsütsü. India nung polio tashidak mali saka linük ishika nung tang tashi lir aser tanaben arutsüa akok. Tanurtem iba tashidak nungi kumzükba ayutsü mechi mapang shia polio vaccine ya agütsür.

Booth Day ya March 3, 2024 anepdang 8:00 ako nungi nikongdang 3:00 ako tashi alitsü, aser iba mapang tsürabor aser tanur anepalur temi pei tanurtem anir arua polio vaccine tzüjang ana-na agidaktsütsü akok.

Oral polio vaccine agiba sülen health workers temi iba mozü agütsüba tali jangjatsü mechi tanur indang temiyong nung ink teptsütsü. Anungji tsürabortemi tanur indang temiyong nung teptsüba ink ya tanur asoshi timtem mali ta metettsüla.

Pai aliba tesem nung health workers, ASHA aser AWWs tem dang nungi osang tali tejangjaba angzüktsü.

Taküm National Immunization Day of Polio Sunday atema iba maparen ya sendaktepa aliba department tem, Faith Based Organizations (FBOs), Civil Society Organizations (CSOs), Village Council Chairperson aser züngsemtem, tetsür lenirtem, IMA, IAP, IDA, Rotary Club aser Lion's Club züngsemtem teyaritem nung inyaktsü.

Bengaluru nung bomb tesashi ka apokba lendong nung nisung 9 yiru



Bengaluru, Metsüremi/ March 01 (Agencies): Hokokbar nikonngang 12:30 ako meta Bengaluru kübok Whitefield kiyong nung aliba kanga nungtugu Rameshwaram cafe nung bomb tesashi ka apokba lendong nung cafe nung inyaker staff asem densema nisung teku yiruogo.

Iba lendong nung yirurtem rongnung nisung pongubo hospital-i anir ao.

Mezüngbo iba lendong ya gas cylinder ka apokba ajanga atalok, ta bilem ajisiuaka IED bomb ka apok ta jangjaogo, ta Karnataka Chief Minister

Siddaramaiah-i metetdaksü. Iba lendong atalokba sülen Deputy Commissioner of Police ao aser Bomb Detection & Disposal Squad nungi k e t d a n g s e r t e m a Rameshwaram Cafe tonga ao.

Rameshwaram cafe ya Bengaluru nung kanga nungtugu hotel ka lir aser mapang ajak nung yangji nisung kanga longsoa dang alir.

Karnataka Chief Minister Siddaramaiah-i, CCTV noksa ajanga nisung kati cafe telung nungji yangkhu ka toktsür aoba jangjaogo, ta metetdaksü.

"Iba bomb ji kanga tarebo masü liasü saka kanga tesashi liasü," ta paisa metetdaksü.

Siddaramaiah-i, "Ni Home Minister aser ketdangsertem den jembio. Mejangjaba nisung kati yangkhu ka bener restaurant telung jagi ai ta parnoki kü nem metetdaksü. Pai token ka alizük aser chiyungtsü achiba sülen yangkhu ka toktsür ao. Yangkhu nung bomb ji liasü, ta kü nem metetdaksüogo," ta ashi.

Police-i iba tesemji nokdangba sülen bushisüngdangba maparen tenzüko.

Taküm India linük tesem ajaklen kanga tatsük asütsü: IMD

New Delhi, March 01 (Agencies): India Meteorological Department (IMD)-i taküm mei mongpu nung India tesem ajaklen kanga tatsük asütsü, ta metetdaksüogo.

March ita nungi May ita tashi linük tesem ajaklen normal maximum temperatures dang nungi tali tatsükba asütsü, ta IMD-i metetdaksü.

El Nino phenomenon ajanga tali atsükba mapang talangba asütsü aser mei mongpu piyong kanga tatsük asütsü, ta parnoki metetdaksü.

Yaküm nungi equatorial Pacific Ocean nung tzüyim-ma temperatures ajanga El Nino

agi India kongshia liasü. IMD-i May ita tashi kanga tatsük asütsü aser El Nino Southern Oscillation (ENSO) neutral-i melentsü ta metetdaksü.

IMD Director General, Mrityunjay Mohapatra-i, "Mei mongpu piyong India tesem tulubaka ka normal maximum temperatures dang nungi tali asütsü. El Nino conditions ajema kümdar, ajisiuaka ibaji ajanga temperatures tali atutsü aser tatsük mapang talangka asütsü," ta ashi.

Taküm March ita nungi May ita tashi akhi mapang dang nungi taküm tatsük mapangji talangba asütsü aser aonung-a tatsük mapang talangba asütsü.

Arunachal Pradesh, Punjab, Himachal Pradesh aser West Bengal tesem kar nungbo maximum temperatures ji normal range nung asütsü, ta IMD-isa metetdaksü.

South India nung February ita talemtibaji taküm February ita liasü aser central India nunga February ita nung akhi ama masü saka takümbo talem liasü.

IMD-isa, March ita tom süiba mapang nungi tenzüka India tesem aika, talisa Andhra Pradesh, Telangana, north interior Karnataka aser southern Maharashtra nung kanga tatsük asütsü, ta metetdaksü.



New Delhi, March 01, 2024: Brihostibar aonung Jawaharlal Nehru University (JNU), Delhi nung Election committee züngsemtem shimba nungi mangatettep adoka Akhil Bharatiya Vidyarthi Parishad (ABVP) aser Left pusemba teloktem nungi kaketshirtem raradang tangokba noksa nung angur.

Election Commission-i Lok Sabha election atema tetuyuba kar agütsü

New Delhi, March 01 (Agencies): Tesüiba küm ishika tsüngda agiba election balala nung nüboyimba mapang nung inyakyim meshidakba dak sendakba nung Election Commission of India (ECI)-i party ajak nem tetuyuba kar agütsüogo.

EC-i yimtenren party ajak dang election atema nüboyimba mapang nung kanga kümdangtsü aser tongtibang onüktem nung ang o enteptsü metetdaksü.

Election Commission-isa 'Star Campaigners' aser candidate tem dang Model Code of Conduct (MCC) ozüng alema meinyaktsü metetdaksü.

Lok Sabha election aser state pezü nung assembly election agitsü mapang ana nung lia Election Commission-i election shilem ajak aser tesem ajak nung party temi ozüng alema inyakbatem EC-i mita reprangtsü, ta metetdaksü.

Hokolbarnü Chief Election Commissioner, Rajiv Kumar-i yimtenren party ajak dang telemsa adokdaksütsüsa meinyaktsü aser kati ka aitsüba dang nungibo pei tangatetba tajung-a lemsateptsüla, ta

metetdaksü.


Taoba mapangtem nung election atema nüboyimdang Model Code of Conduct alema inyaker star campaigners (nübo yimtsürtem) aser candidate temi maneni MCC alema inyakra temerenshi tulu alitsü, ta EC-i metetdaksü.

Pei tebilemba sadoka jembiba temedenji tim masüba nungbo mamshitsüla, aser jembishinü nung kanga atsü-anem akatsüla, ta Election Commission-i metetdaksü.

Information technology aser social media tsütsülen nungi tayongzükkba balala aliba angateta EC-i yimtenren party tem, lenirtem aser candidate tem dang social media ajanga lenirtem tsüngda mezüngmeshi mesüteptsüla, nisungtemi magizüktettsüsa kecha melemsateptsüla aser pei akhümket samatsüsa kecha melemsateptsüla, ta metetdaksü.

Representation of the People Act, 1951 nung Arrla 77 kübok "star campaigners" ta shia alibaji election nüboyim sentongtem nung party balala nungi o jembirtem lir. Parnoki maongka balala agitsü akok saka tangatetba tajung nung inyaksangshitsüla.

Delhi sorkari meshimetsür 1,300 nem skills training agütsür: Atishi



March 01, 2023 nü Delhi legislative assembly nung Finance minister Atishi-i Delhi Economic Survey sayadang tangokba noksa nung angur.

New Delhi, March 01 (Agencies): Yaküm Delhi nung G20 magidang survey ka agiba ajanga bushitetba meshimetsür 1,300 nem tang Delhi sorkari skills training agütsüdar, ta Delhi Economic Survey ajanga metetdaksü.

Hokolbarnü Delhi legislative assembly nung Finance minister Atishi-i Delhi Economic Survey metetdakja liasü.

Delhi Urban Shelter Improvement Board (DUSIB)-i ketdangsuba night shelters-i anir oa jenokdakja alir meshimetsürtem nem skills training agütsütsü atema Department of Social Welfare nem mapa lenzükja liasü.

Meshimetsürtem teka mapa balala inyakteta taküm akhümketa litetdaksütsü atema parnok nem skills training agütsü, ta report nungji shia lir.

Yaküm Delhi nung G20 summit metenzükdang inter-departmental committee ka jelia tenteta liasü aser

meshimetsürtem nem teyari agütsütsü atema parnok nem mapa nunglokja liasü.

Iba committee nung züngsemtemji Delhi Urban Shelter Improvement Board, Delhi Police, Department of Women & Child Development aser Social Welfare Department liasü.

DUSIB aser Shelter Management Agencies (SMA)-i Department of Women & Child Development aser Social Welfare Department den longjemer 2022 küm December 21 nungi December 23 tashi yimti tesem balala nung survey agiba mapang nung meshimetsür 1,300 dak tema shimteta liasü, aser tang parnok nem skills training agütsür.

Iba survey agidang talidak malir meshimetsür 1,312 jangjaba sülen parnok night shelters-i anir ao aser skills training agütsür, ta kasa report ajanga metetdaksü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

METSÜREMI 02, 2024

Nisung tasen ka

Y akanü Dimapur nung tetsür o tetsür na aser tebur o tebur na medemertem aser tetsür-a masü aser tebur-a masü ta alir LGBTOQ+ purtem lokti senden ka ayongzüka akabaji Nagaland nungbo mezüng asütsü. Iba jagi loktiliba nung magizüktetba sobaliba ka temai nungpoka adokba sayur. Joko, kecha mimshia jembitsüa mali aser aitsüyonga makoktsü aser nokdangyonga menokdangtetsüsa iba telok ya kin balaka amai küma telok tentetogo. Yashi tashi alima nung nisung tapu ana dang liasü, tebur aser tetsür. Anaji kati ka nungdak atalokdakja külemi alitsü Tsüngremi yanglu ta Laishibai ashir aser idakji asenoki amanger. Ajisüaka, tanü putu nung nisung tasen ka tetsür-a masü aser tebur -a masü ta alima nung lir aser itemji Nagaland nunga lir. Iba nisung tasen aser tasembubaji alima yimteni dang masü arogoa karibo agizükogo. Ibayongji, tanü asüngbo nisung ka nungdak atema tenüng zülua form fill up asüandang tebur, tetsür mesüra tasembuba nisung ta ka shimteta zülutsü tawa toktsür. Atangji, moijing-a tetsür aser tebur lir ta jembir saka mojing tetsür-a masü, tebur-a masü ta alibabo jembia mangashi. Anungji, tetsür-a masü aser tebur-a masü ta asütsüsa litetba nisungji kenyongi balaka, pa ta asütsüa makok aser la ta asütsüa makok, anungji nisunga masü, moijing-a masü aser tsüngrema masü ta nisungbo nisung ser nung balaka sotetba taküm ka lir. Iba jagi asenok lokti, yimten aser arogo nükenbelemdaksür. Atangji, nisung tasen adokbajang masü saka tanü loktiliba nung tetsür o tetsür na aser tebur o tebur na medemba aser apuani küma kibong akümba sobaliba tasen ka agi asen lima tongogo. Iba denji ano tetsür agi tebur akümba aser tebur agi tetsür akümba purtem karbo lir. Item jagi parnoka lokti nung senso tajung ka ama züngoktsü aser parnok sobaliba tasenji yimteni agizüka temeten agütsütsü asoshi akanger. Joko, iba mapa ya atsükshishia inyakba mapa ka masü saka yimjak nung nüchiso asoshi rarar telok ama, telok kümteter pei temeten meshia longkak aitba telok ka kümogo. Atangji, itemji nisungbo nisung, kechiyong parnok ajakji tetsü ka bok nungi asoba purtem lir, anungji parnokji lokti nungi aridoktsü melen, asenokiang meyiper parnok tebilemstsü aser taginübaji angatetsü merangtsüsa akümer. Tetsüri tetsür den aser tebur tebur den medemba mesüra tetsüri tebur kümnüba aser tebur tetsür kümnüba shisatsüji nisung ka tain kümer ajungbena atalokba yimya ka masü saka tanur asüdangyongi iba shisatsüji dener aiener. Tetezü tasodang nungi iba yimya nungji asor, anungji parnoki mangatet ser asaa inyaker amato asenoki bilema aitsütsülaa masü. Aji oda, tanur karbo tanur asüdangyongi tetsür ser nung tebur süoshi dang sübuner aser kazütsü oseta tebur amshiba oset prangpong ama dang amshiner. Kasaji, karbo tebur ser nung tanur asüdangyongi tetsür amai dang süboner aser tejembia tetsür amai dang jembiner. Iba jagi dang peisasa pei dak nümadangteta bilemer. Itemji tasodang nungi keter asoba azü , shisatsü aser yimayimkotem lir. Atangji, temeteter tsürabur karibo itemji tanur asüdangyongi inyakyim aser anepalubaren nung metongshia shitak anitetter. Joko, tanübo item nisung tasentemji yimteni sen achiba agi ajungla masü aser lokti aser arogo nungi aridokba agia ajungla masü, kechiyong parnoki bilemba aser inyakbaji parnok dak keta aliba shisatsü agi inyaker, anungji parnokji yimten aser lokti nung anioktsüsa akümtsü. Ajisüaka, arogo nunga koda (?) ta asüba tasüngdangba aser tebilemdangba agi tanü asen lokti aser arogo shisaboludagi. Parnok sobalibaji junger ta ashitsüla masü, kechiyong item nisung taseni benshiba sobalibaji Laishibai dang masü asen sobalibaia memelar. Iba ama terata mapang nung ya meshitak sobaliba agizüka benshirtem arüja sayutsüngiba aser lokti nung jendokba agi parnokji dang asenok nungi talangba talangba pilaa odaktsür asütsü aser tesüsabo asenok ajak akoksatsü. Anungji, parnokia parnok taküm yimyajji lokti nem agizükdaktsüner süra asenokia parnokji angatetsüla aser temeim agi len shitakbaleni anir arutsü merangtsüla.

OLEMSABANG

Nükla Akaba Lanur

Miss Imotila

Tanü alima koda tejakleni aor iba den lirumedema lanur ka ji nükla kaka yur, alima nung liyonga aotsüji kanga tongtibang. Nükla tajung alir lanur kati pei taküm jenjang yanglushiteter aser kechi nung südir süaka pai takok angur. Nükjidong maliba lanuri tamakok dak alaka kecha mangur. Shisa bushir mesüra kaket balala bushir mesüra alima nung mapa balala bushir atema parnoki nükla tajung yur pei mapa nung meranga inyaksüla. Nükla maliba lanurji car-i nung toztü meinok ama lir tetezü kari lir, tanishira lir saka kodang toztü melidir iba car-ji kodanga tejakleni muotetsü yamaji lanur ka taküm nung pai ajak zünga shia lir saka kodang pai pa teinyaktsü mapa nung nükla melidir pa mesüra la mapa nungji tamakok alur. Alima ya kanga tejakleni aor asünung, nisung shia pei nükla dak ajemdaker kechi mapa südir temulung agütsüa inyaksüla. Aiben alimar yimya asünung asenoki pei mapa mesüra aseni shia metetba nungji kisüng rangloker saka nükla ayutsübo aseni amar, itemla jaki aiben jaka aisü nung tamakok alutaktsür asünung kodang aseni asen tamakok metetta nükla ayutsüla ta shisateter, pei inyakba wadang inyakdir yangji takok lir. Lanur ka taküm nung pei tejangraba aser teinyaknüba aika lir, saka kodang pa mesüra la nükla melidir item nungji tamakok alur aser aiben lanur yangji pei taküm nung kechi akümtsü aji mejangjai rongjenseta alir. Kodang asenoki repringdir nükla yur pei taküm liyonga aori aiben takok angur saka nükla maliba lanuri aiben tamakok dang angur. Shisa bushir süaka pai kodusür tatidang nung takok angutsü ta sür pai bushidir pai takok angur saka aikati oda tebushirji bushir ta asür, parnok par tatidang nung dangar memeneptsü aser taküm, shisa bushiba nung tamakok angur. Kodang lanur kati pei kechi nükla yur meranga inyaker, pai mesüra lai takok den khonang nüngsang angur. Saka ano kodang nükla bo aika ayu mesüra aika lir saka lanur kati iba nükla nungji ajemdaker meranga meinyakdir yangia tamakok dang alutsü. Nükla ayuba denji külemi ano meranga inyaksüla tetezü car-ia lir, anira lir aser toztüa lir saka kodang taniri pei lenmang shidak aotsü memetet mesüra tanidang temulung agütsüa manitir aiben lendongsa ajurur. Alima nung nisung shia teinyaktsü aika lir tanur/tain/ tsürabur/lanurtem asüyunga, pei lenmang mesüra pei kechi inyaktsü iba nungji nükla yur inyaksüla. Nükla yur inyakdang tamakok alura yangji kodanga temulung majemtsüla.

kechiaser ka nung tamakok aluyonga tanaben ano tashiitshir talilaba meranga inyakra yangji teti takok tajung angutsü. Nükla tajung yur inyakba nung kodanga menua mali. Nükla yur aremzüka meranga inyaksüla. Khen khen tamakok anguba nung temulung majemtsüla saka iba nungji ajemdaker ano tali temerangba aser ochi shia inyaksüla.

Lanur ka jenjang aser tarutsü nung pai kechi inyakdir mesüra kechi bilemer item ajak nungji nükla yur inyaksüla, aser iba yongji pai mesüra lai takok angutsü. Nükla akaba lanuri pei takum nung takok tajung nguteter.

Nükla Akaba Lanur

Miss Pursangla

Tanü ni iba ya asenok lanurtem den tatsü agi yamai lemsateper. Nükla Akaba Lanur ka sutettsü asoshi asenoki pei nükjidong shimtetba ama inyaksangshitsüla aser yamaji alitsüla kechiaser aseni o agi jembizükaka mapa agi meinyaktetra item ajakji amajok dang akümtsü aser asenoki item ajakji ulua bilemaka Tsüngrem den tesentaktep makara ajakji amajok akümtsü anungji item nüklaaji ataloktsü asoshi Tsüngrem dang maneni sarasadema alitsüla.

Ajiang tanü tensa repringdangra kongro aser sangpang tajungtem aika alima shi jangraba nem kokdaktsür aser ibaji ajanga lanurtem aika tipu limai shilanger aser lanurtem ajak makmakshimakdakja alima jangraba sülen nemzüa jajar aser asen lima tesem ajak tammang kümdakja mepet agi sübanga ayu ama küma dokogo. Lanur kaji kodaser pei nüklaaji ajangzüker alima yanglushitsü ibaji meteta alitsü tim.

Lanur karbo pei nükla matalokba ajanga pei temang raksatsüsa nemzüa pei temang aser taküma mapayui inyakba angur aser pei tsürabur tsüngda nunga tejashitep adoker item ajakji asenok lanur dak dang keta lir kechiaser asenok taküm nung inyaksangshi mesura kechisarena ajak nungji asen temulungjang ajanga dang anidaktsür aseni tajung bilemra teti pela dang alitsü saka kodang asenoki pei indang tamajung dang repranga lidir kodanga aseni bilemba amaji masütsü aser mataloktsü anungji arung asenok lanurtem iba dang ya tali kümkümshir asenoki alitsü merangdi.

Tatem nung ni iba ya asenok lanurtem ajak den lemsatepnür, nai tapu aika bilemaka Tsüngrem dak tamang makara amajok. KIBUBA ji asen tebu kümtetdakba aser tashi tulusang lir. Tanü alima ya temenenpur teimba küma odagi. 1841 küm American Baptist Foreign Mission Society (ABFMS) parnoki tamangba yimsü asen Naga lima nung Tsüngrem osang bener arua sayuba ajanga asenok Naga nunger küm 150 tashi junga amanga arur anungji arung lanurtem asenoki Tsüngrem nem asen tebilemstsü ajak yutsür Pa tenzükdü ta ni asenok den tanü tatsü agi lemsateper.

(Iba ocet ya Changtongya Town Baptist Arogo nung lanurtemi küm nung khen adokba "Tebjem Washir" 2023 kaket nungi agiteta adoktsür.)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung kiyimba ozüing tasenba Khristantemi pelaa agizüker

March 01, 2024: Pakistan nung sorkari Khristantem kiyimsü atema temsüa akümba arrshi küm telatet ajungkettsüba atema linük nung Khristan lenirtemi pelaba lemsatepogo.

Sorkari iba telemtetba agiba ajanga kangshia Islam yimsü dangi meypdaksüba aser Khristan tetsür chanutem anema inyakba nokdangtsü, ta Khristan lenirtemi metetdaksü.

February 26, 2024 nü Pakistan Senate-i agizükba Christian Marriage (Amendment) Bill 2023 ozüing ajanga 1872 küm British nung yimsüsüba mapang benokba ozüing tejenba melener.

Pakistan nung iba ozüing tasenba kübok Khristan teburtem kibong akümtsü atema arrshi küm tajemba agi 16 aliba nungi 18 kümtsüogo aser tetsür ka kiyimsü atema arrshi küm tajemba agi 13 aliba nungi arrshi küm 18 kümtsüogo.

Church of Pakistan Tir, Azad Marshall-i sangdong ka ajanga, "Iba ozüing yanglushiba ajanga tetsür chanutem, talisa yimtsüngtem nung aliba tetsür chanutem anojungi kiyimdaksüba nungi kümzüksü aser parnok health, shisaliok aser lenla ajak nung renloktsü," ta metetdaksü.

February 27 nü Azad Marshall-i, "Iba ozüing tasenba ya (Khristan) tetsür chanutem kangshia tanga yimsü dangi meypdaksüba aser tangartemi tim masüba nung shi nung

medemba nungi kümzüksü atema kanga tongtibang ozüing ka lir," ta metetdaksü.

Protestant Arogo nung lenir, Marshall-isa, "Minority tetsürtem kangshia Islam yimsü dangi meypdaksüba ya ozüing alema inyakba mapa ka asütsü atema sorkar tasenbai nüngdakba ozüingtem agizüksü, ta onoki imlar," ta metetdaksü.

Khristan lenirtemi ashiba agi, Pakistan nung Muslim nung teburtem kangshia Hindu aser Khristan tetsürtem puer oa tashiyim amshia raksatsüba sülen Islam yimsü dangi meypdaksü.

Pakistan nung Muslim nung teburtem kibong akümtsü atema arrshi küm telatetji tajemba agi 18 lir aser tetsürtem küm 16 lir.

2013 küm Pakistan kübok Sindh province nungbo tetsürtem kiyimsü atema arrshi küm tajembaji 18 bosa asütsü ozüing lateta liasü.

Tesüiba küm ka tsüingda Pakistan nung Muslim nungertemi Hindu aser Khristan tsür 136 puer oa kibong akümtsü atema kangshia Islam yimsü dangi meypdaksüogo, ta Khristan melungtet telok Centre for Social Justice (CSJ)-i metetdakja liasü.

Tang sorkari latetba ozüing tasenba ya onoki pelaa agizüker, ta CSJ Director, Peter Jacob-ia metetdaksü.

Pakistan nung Council of Islamic Ideology-i tetsürtem

tainlonglong akümba sülenbo kibong akümtsü atema melar, ajisüaka yimtsüngtem nungbo tetsürtem tainlonglong makümdangyongi kibong kümdaksü aser Khristan tetsürtem anojungi kibong kümdaksü.

Taoba mapang Pakistani Catholic Bishops' Council indang National Commission for Justice & Peace nung secretary, Bonnie Mendes-i, "Catholic Arogo kübok kibong akümtsü temsüa akümba arrshi kümji 18 lir saka putirtem kari sen aazüksü atema tanurtem kibong kümdaksü. Ajisüaka tang ozüing tasenba ajanga iba ya nokdangtsü," ta metetdaksü.

Marshall-i, mapang talangka nungi Khristan lenirtemi Khristan tebur aser tetsürtem kibong akümtsü atema arrshi küm telatetji 18 bosa asütsü atema takhangba agüja aruba sülen tang atangji iba ozüing latetogo, ta metetdaksü.

Marshall-i, tarutsü nung Pakistan Parliament nung Christian Divorce Act of 1869 ozüing-a agientsü imlar, ta ashi.

Christian Divorce Act of 1869 ozüing kübok apuani rongnung kati tangar den nüktapangta nung ang Khristan kati balatsü akok. Catholic Arogoibo balalulaba ya memelunger, ajisüaka Pakistan nung meimchir temeden atema inyaker telok kar aser Arogo karibo Christian Divorce Act ya yanglushitsü nüngdaker, ta ashir.

ANOGO ABEN TSÜNGREM DEN

Tanen makai meimba

Aser Kibubai kü dang ashi, ano oang, züngatsür ka shiba la tembari meimer aser nüktapangtatsür ka lir, la meimang: oda Israel chirtemi tangar Tsüngrem dangi meypaka aser kismis amtsük meimaka, nai meimang. Hosea 3:1

Meimchiri Tsüngremi Pa chirtem meimba angajemtsü makok! Meimchir telatet temeim asenoki ajangshia aruba tangatetba agi Tsüngremi odang asenok meimba nung tetsükdaksü agütsür. Asenoki iba temeim noksa Hosea taküm nung angur.

Hosea temeshi nisung ka liasü, saka temenentsür ka agitsü Tsüngremi pa dang ashi. Hoseai tashi angaa Gomer pa kinüngtsü asütsü agi. Pai la peladaksü aser akhüm tsübua amshi. Gomeri iba ama temeim ajangshia maru, saka lai yakta temulung masü aküm. Lai la temeim tangar tebur nem agütsü. La nüktapangtatsür ka aküm aser yakta Hosea toktsü. Tangar nisungi la amshi aser la kecha makai aküm. Idangji parnoki la alar asütsü ayok. Iba sülen, Tsüngremi Hosea nem tesümgangtsü ozüing ka agütsü: "Oang aser la tanaben alizükang." Gomeri pa yirutsüa liaka, Tsüngremi Hosea dang la dang tai atoktsü ashi aser alizüker kidangi anir arutsü ashi.

Tsüngremer osangji tejangja: kodang asenoki Pa magizüklir aser asenok tebilemba tangalen kati meypdar, nüktapangtatsüri inyakba mapa nung temulung amsaba ama kasa timtem agütsür. Ajak rongnung Tsüngremi asenok asoshi inyak, ibaji memetetti alitsü makok. Asenoki Pa mesentoktsüla. Asenoki Pa amadokaka, Tsüngremi kodang asenok mamadoker, asenok temeim dang nungi Tsüngrem temeimji balaka lir. Pa temeimji tabensa temeim lir. Pa temeimi asenok Pa dangi anir maru tashi asenok temenen taroktiba tashi bushir. Pa temeimi ajem ajema malir. Kodang asenoki Pa nungi pilaa odir Pai maneni asenok anishir. Koda tesümgangtsü temeim Pai asenok dang sayu, meimer.

Chhattisgarh nung Khristantemi anti-conversion bill tasenba ashishir

March 01, 2024: Chhattisgarh state sorkari anti-conversion bill tasen ka benoktsü atema maparen tenzükba sülen Chhattisgarh Christian Forum densema Khristan melungtet teloktem aser meimchir temeden atema inyakertemi ibaji ashishia ola adoker.

Iba bill ji yimsü temeden anema lir, aser ibaji ajanga state nung yimsü balala amangertem tesünep nung aliba raksatsütsü, ta aikati ashir.

Bill tasenbaji agizükra iba ozüingji ajanga Chhattisgarh Dharma Swatanrya Adhinyam of 1968 melentsü aser yimsü meypba ozüing kübok aibelenertem nem ano temerenshi tuluba agütsütsü, ta osang angazüker.

"Chhattisgarh Prohibition of Unlawful Religious Conversion Bill" ta ajaba draft bill nung aliba ozüingtemji meimchir temeden atema inyakba telok balala aser Khristantem densema minorities-i ashishir.

Iba ozüing tasenbaji agizükra nisung kati tamangba yimsü melentsü atema anogo 60 jelia district magistrate dang nungi temelaba meshitsü aser yimsü meypdaksüba ketdangtsüa agitsüpurtemia jelia sorkar ketdangsertem nem osang metetdaksütsü.

Iba ozüing kübok kangshia

mesüra mesüzüka yimsü meypdaksübaji ozüing alema inyakba mapa asütsü aser aibelenertem küm 10 tashi tepuokdak ayutsü aser senchi sen 50,000 tashi achitsü.

2006 küm taoba mapang BJP sorkaria anti conversion dak sendakba bill ka benoka liasü saka aikati iba bill anema ola adokba ajanga magizükteti liasü.

Küm 18 sülen tang maneni iba bill benoktsü meranger.

State nung, talisa tribal aliba tesemtem nung Khristantemi tribal nisungtem Khristan yimsü dangi meypdaksü, ta tai tonglokja asentenshir ozüing tasen benoktsü meranger.

Chief Minister Vishnu Deo Sai-i, Khristan missionary temi shisaliok aser healthcare service agütsüba tenüng atemer Khristan yimsü dangi meypdaksü; kodang item maparenji nokdangtetdir Hindutva tashi aittsü, ta shiogo.

Chief Minister-i Khristantem aitsüba o dak sendakba nung Chhattisgarh Christian Forum Tir, Arun Pannalal-i, osang tejangja memeteti jembibaji tagidak maka, ta ashi.

Pannalal-i, "Parnok (minister tem) nem osangbenertem senden ka ayongzüka jembidakjang, aser 1950 nungi 2024 küm tashi nung nisung kwi

Khristan yimsü dangi meypdaksüar onok dang shiang. Tajemdakdak makai o jembibaji menüngdak," ta ashi.

Paisa, "Tribal nisungtemi yimsü ka den danga sendaktepa mali aser Scheduled Tribes nungi nisung mashie kati yimsü mashie amangtsü akok. Anungji tribal kati yimsü ka agizükra ibaji yimsü meypdaksüba kübok maiter.

Tribal kati Hindu mesüra Khristan, mesüra yimsü mashie ka agizüktsü atema pa dakji temeden lir. Tribal nisungtemi Hindu yimsü agizükbaji onoki (Khristantem) mashishir, anungji parnoki (tribal) Khristan yimsü agizükba atema kari ashishitsü asü?" ta asüingdang.

Chhattisgarh sorkari anti conversion ozüing tesashiba

benoktsü merangba atema lokti tentettem aser legal tsütsü mongintemia aitsüogo.

Pannalal-i sorkar dang, "Olulu meproksüla aser yimsü balala amangertem tsüingda tensa meraksatsütsüla. Asenok (Chhattisgarh) ya yimjung meimba state ka lir, anungji onoki ketdangsertem dang tang aliba amai dang lidakjang ta mepishir," ta metetdaksü.



Telangana state kübok Secunderabad nung nisung kari Khristantem mang aremba leper ka nung mailung aika raksaja aliba noksa nung angur. February 21, 2024 nü mejangjaba nisung kari St. John Arogo cemetery raksatsüba tatalokba Khristantemi aitsüba den külemi ketdangsertem dang aibelenertem aputsü takhangba agütsüogo. February 13 nüa Hindutva telok kati Telangana kübok Rangareddy district nung Methodist Arogo Tenla ki ka raksaja liasü.

UN tekolakbai Gaza aid convoy lendong bushisüngdangtsü ajungshi

Gaza City, Metsüremi/March 01 (Agencies): Gaza nung teyari agütsüba mapang Palestine nung 100 dak tema asüba atema UN-i bushisüngdangtsü ayongzükba nung linük aika adener.

Brehostibarnü teyari oset bena aliba gari müketa nisung aika adenshia lia Israel sepaitemi amak aser iba mapang nisung 117 asü aser 760 dak tema yirua liasü.

UN Secretary General António Guterres-i iba tatalokba ya aitsü aser civilian tem tangsa teyari nungdaker ta ashi.

Israel-i civilian dak injang khaloktsü ta Hamas-i tai tongloktsür, saka Israel-i ashiba agi, parnokki tekumdangtsü atema injang khaloktsüba sülen timba ajemset.

France Tir Emmanuel Macron-ia Israel aitsü aser Israel sepaitemi civilian dak tenük yok ta ashi.

EU indang foreign policy chief, Josep Borell-ia iba tatalokba ya khenyongi magizükter ta ashi.

Iba tatalokba indang Guterres-i social media nung, "Gaza nung Brehostibarnü atalokba ni aitsür, kong nisung

100 dak tema takum kumzüktsüba teyari bushidang tepset mesüra yiru," ta zülua liasü.

"Gaza nung aliba civilian tem tangsa teyari nungdaker, aser item rongnung north tsütsü alirtem densema lir, kong UN-i hopta ka dak tema teyari magütsüteter."

Hokulbarnü France, Italy aser Germany linük temia aid convoy asüba indang bushisüngdangtsü ayongzükba liasü.

Gaza nung Hamas meyong health ministry ajanga iba tatalokba ya "massacre" lir ta ashi.

Iba tatalokba indang jembitsü asoshi UN Security Council ajungben senden ka amen aser yangji Algeria-i draft statement ka benokba nung Israel-i injang khaloktsüba tenüng sena lir.

UN Security Council nung züngsem 15 aliba nungi züngsem 14-i iba sangdong bhukum saka US-i nokdang, ta Palestinian UN ambassador Riyad Mansour-i ashi.

US envoy Robert Wood-i iba tatalokba indang osang tejangja mali ta ashi.

Brehostibar lendong ya

Gaza City tezülen Nabulsi tesem nung anepdang 4:45 meta ataloka liasü.

Egypt nungeri teyari agütsüba bena aliba lorry 30 ya "humanitarian corridor" ta Israel Defense Force-i ajaba lenmang nung jaja liasü.

Iba mapang civilian temi item gari ya lungbang aser gari temai ayaketa arutsü tenzük, ta IDF odongtar Rear Adm Daniel Hagari-i ashi.

"Parnok kanga nungtepa liasü aser iba mapang karbo ajemset aser teyari osettem auya," ta pai ashi.

Israel nunger indang tank temi tekumdangtsü atema injang kar khaloktsü, saka nisung timba akumba ajanga ainshi, ta ashi.

Ajisüaka nisung karbo tangsa tepsettsü nükjidong nung tekolak nung akhaba kuli tejangja lir, ta Hamas-i ashir.

October 7 nü iba rara tenzük tang tashinung tanur aser tetsür 21,000 densema nisung 30,000 dak tema Gaza nung tepsetogo ta Gaza indang health ministry-i sangdonger ghonda ishika tsüngta iba lendong ya ataloka liasü. Nisung 7,000 shi samar lir aser 70,450 shi yirur lir, ta ashir.

Bangladesh shopping mall nung mi adok, nisung 45 asü

Dhaka, Metsüremi/March 01 (Agencies): Bangladesh yimtiba Dhaka nung aliba shopping mall tuluka nung kitsük-kirong lendong ataloka nisung 45 asü aser aika yiru.

Brehostibar aonung Green Cozy Cottage Shopping Mall nung kongshiba mi ya floor mezüngbuba nung aliba biryani restaurant ka nung tenzük aser iba mi remseptsü atema firefighter unit 13-i ghonda ana agia liasü.

Timba tango mesashiteti asü aser kar iba building nungi pongzükba mapang asü ta doctor temi ashi. Sorkar meyong mozüki ana nung mi agi ronger alir aika anepalua liasü.

Fire service ketdangtsür Brigadier General Main Uddin-i ashiba agi, mi ya gas leak mesüra stove nungi adok alitsü. "Iba building ya kanga tetsübotsüka lir, kong floor shia aser staircase nunga gas cylinder liasü," ta pai osangbener dang ashi.

Asürtem temang abeni kinungertem Hokulbarnep mozüki nung adenshi aser nisung kar emergency department kima mang yima liasü. Asürtem ya timba akumtsü akok, ta Health Minister Samanta Lal Sen-i osangbener dang ashi.

Iba lendong nungi tera agi takum mesamai kumzükter Mogammad Altaf-i ashiba agi, pa sorochiokdak tesemi ao aser window ka kakpoker pongzük. Mi adokli nüburtem dang iba ki nungi ainshitsü ajungshia alir cashier aser server ka tatsüka lir asü, ta pai ashi.

Ato Kilonser Sheikh Hasina-i iba lendong atalokba atema taoksaba aser tejashi lemsatepogo aser ketdangtsürtem dang tekeraba nung yirur alirtem yaritsü totuyuba agüja liasü.

Iba tatalokba bushisüngdangtsü atema sorkari züngsem pongu aliba committee ka kumtetogo.

Nisung onsara aliba Dhaka yimti nung kitsük-kirong lendong ya mapang shia ataloker, kong ki tasen aika yangluaka iba ama lendong nungi kumzüktsü mera kecha agia mali. Gas cylinders tamajung apokba, air conditioners aser electrical wiring majungba nungi mi adoka apokba lir.

2021 kum July ita Dhaka tezülen food processing factory ka nung mi adoka tanur aika densema nisung 54 asü aser 2019 kum February ita kum aika tejen tesem ka nung mi adoka nisung 70 shi asü.

2012 kum kitsük-kirong lendong ka atalokba aser 2013 kum ki ka chirepba nung senteper garment factory nung inyaker nisung 1,200 dak tema asüba sülen garment sector nung ketdangtsürtemi tenük yoker meita aor.

Ajisüaka danga industry nung kitsük-kirong lendong atalokba nung nisung noklang aika süogo.

Iran nung parliamentary election agir

Tehran, March/Metsüremi 01 (Agencies): Mahsa Amini asüba sülen tetsür ajak hijab inoktsü ozüing mechi 2022 kum nüburtemi longkak aitba sülen Iran nung Hokulbarnü parliamentary elections mezüngbuba agia vote agütsü tenzükogo, saka election nung nisung kwikati shilem agitsüar mejangja lir.

Iba election nung arishi kum 84 tain Iran indang Supreme Leader Ayatollah Ali Khamenei vote mezüngbuba agütsü, kong linük indang Assembly of Experts züngsem tasen shimtsü. Khamenei ya menden nungi alura mesüra süra kum ti kümsük tenzükba putir telok kati supreme leader tasen ka shimtsü aser Khamenei tain akumer asünung parnok shilem ya tongtipang akumer.

Tehran nung osangbener telok ka matsüngdang Khamenei-i vote agütsü aser 1981 kum bomb pokloktsüba sülen marakzüteti kumer aliba pa indang teka tachichi nungi teka tabelen agi ballot agizükdang tera atentena liasü. Khamenei-i vote agütsüba ya tetsür kati jeba la indang mobile phone nungi tangoka liasü. Pai nüburtem dang akok tashi tekeraba nung vote agütsütsü ajungshi aser Iran tembar aser tsükchirtemi repranga atar ta ashi.

"Ya züngzünga angang, tembartem peladakjang aser temenenpur jashidakjang," ta pai

ballot boxes anasa noksaker ashi.

Iba election indang results ya Honibarnü tashinung angutsü imlar. Islamic Consultative Assembly ta ajanga züngsem 290 aliba parliament atema candidate 15,000 shi tokteper. Iba kümsük ya kum pezü atema lir, aser menden pongu Iran indang religious minorities atema wazüka yuja lir.

Ozüing nungbo parliament yagi executive branches, tesendaktep balala indang vote agütsütepba aser danga ken o balala ketdang asür. Ajisüaka asangsang nungbo Iran indang tashi ya supreme leader dak keta lir. Tesüiba kum 20 tashi hard-liners temi parliament amokbanger aru aser mapang shia "America nunger asoshi tasüba" ta ayimtena liasü.

1999 kum Iranian university students anema nokdakba bhukumsang taoba Revolutionary Guard general aser tang Parliament Speaker Mohammad Bagher Qalibaf kübok legislature temi 2020 kum bill ka benoka Tehran ya United Nations nuclear watchdog, International Atomic Energy Agency den tesendaktep rakdang.

Iba sülen US tir inyaka alisang Donald Trump-i America ya Iran-i 2018 kum world powers den nuclear deal yanglua aliba nungi atsüing aser Iran-i nuclear nok-nü aika yanglutsü atema uranium peria yanglua liasü.

Texas nung morokmi adoka aliba meremsepteter

Houston, Metsüremi/March 01 (Agencies): US kübok Texas state puti otsü nung morokmi tulutiba adoka aliba emergency crews temi Brehostibarnü meremsepteti liasü aser iba mi yagi nisung ka rongsetogo aser ali acres million ka shi rongogo.

Texas A&M Forest Service ajanga ashiba agi, mopung sashia aonba ajanga tesem trok nung mi tulu jangrua lir aser pongu state north tsütsü Texas panhandle ta ajaba tesem nung lir.

Morokmi tulutiba Smokehouse Creek Fire ya Hombarnü tenzük aser tasazük 1,075,000 acres (435,000 hectares) akum aser shilem asem dang remsepteta lir, ta forest service ajanga ashir.

Smokehouse Creek ya danga mi ka den tangtepa ibai Texas nung morokmi tulutiba kumogo, koba 2006 kum ali acres 907,000 arongba East Amarillo Complex dang tuluba akum.

Tesem balala nungi nüburtem ainshitsü totuyuba agüja lir aser Stinnett yimti nung arishi kum 83 tain tetsür ka tasüman angu, ta Hutchinson

County emergency services odongtar Deidra Thomas-i ashi. Stinnett nung structure 20 shi mi agi rongdokogo ta lai ashi.

Governor Greg Abbott-i Mongulbarnü Texas county 60 atema disaster declaration agüja liasü aser iba mera ya ajanga morok mi remsepta nung nungdakba rongsen tekeraba nung agütsür.

Tir Joe Biden-i linük south tsütsü arütsü semdangba mapang, Texas nung morok mi remseptsü atema federal personnel 500 mapa inyaktar ta osangbener dang ashi.

"Item morok mi agi timtem agütsüba nüburtem kumzüktsü asoshi akokba mera ajak agitsü ni toyuyuba agütsüogo aser Texas aser kidanger Oklahoma nem federal teyari agütsütsü," ta Biden-i ashi aser tzi-mopung melenba magizükertem aitsü.

"Tzi-mopung melenba mali ta bilemer Neanderthal tembar kar ni meimer," ta pai ashi.

United States aser Canada nung aliba yimti balala nung February ita temperature timba akumba nguogo aser tesem kar nungbo meyi mapang ama atsüker.

GOVERNMENT OF NAGALAND OFFICE OF THE LABOUR COMMISSIONER New Capital Complex NAGALAND: KOHIMA

BOILER ATTENDANT EXAMINATION NOTIFICATION

Dated Kohima, the 9th of Feb' 2024.

No.LBR/F&B-3/3/2022: In partial modification to the Department's Notification No. LBR/F&B-3/3/2022, dated 8th of Jan' 2024, the time period for submission of forms for Boiler Attendant Examination of II classes is hereby extended till the 30th of March, 2024. The exam will be held as per the Nagaland Boilers Rules, 1996 and the exact date and place of examination will be notified at a later date. All other requirements will stand as per the notification issued previously.

Sd/-
(Er. S. L. WATI AIER)
Chairman,
Nagaland Boilers Board cum
Labour Commissioner and CIF&B,
Nagaland, Kohima.

LAND FOR SALE

Behind Sovima Cricket Stadium

CONTACT
8974020568

RATE Rs. 490/- per Sq.ft.

ANY SIZE AVAILABLE

- Price Negotiable -

KDFA-i Nagaland Football Team (40+) champions tushia amshi



Kohima, Metsüremi/March 01 (TYO): Kohima District Football Association (KDFA) ajanga Goa nung 6th National Masters Games 2024 champions, Nagaland Football Team (40+) pur nem tetushi agütsüba sentong ka March 1, 2024 nü ayongzüka agia liasü.

Hotel 2K, Kohima nung iba sentong moaja jembidang retired DGP Nagaland aser Nagaland Veteran Football Association (NVFA) tir K Kire-i parnok nem tenüngsang agütsü, shirnoki state asoshi konang tetushi bener aruja liasü.

Naga nunger asoshi football ya tongtipangtiba aser temeimtiba asaya lir aser arishi küm telemsa makai ajaki maneni asayar, ta Kire-i ashi.

State asoshi konang bener aruba den külemi Nagaland team-i zünger mezüingmai lenla balala nung bendanga agütsüba asoshia pai tenüngsang agüja liasü.

Training agiba mapang nungi tenzüka parnok

senzüsempongba, achi-ajemba aser memetetba nung senotsü jenti par asayartem sasa menoka liasü, aser parnok Nagaland asoshi asaya asünung, sorkaria teyari terabo agütsütsüla, ta pai ashi.

"Olympic disciplines atema kisüng masü saka Sports Department-i tang ama danga competitions asoshia senotsü terabo rizünga yua alitsü imlar. State nungi asayar temi iba sentong nung 2019 küm nungi shilem agia arur, saka par sasa senotsü indoka senzür," ta Kire-i ashi.

Olympic ajanga recognise süa liang-teli, asayartemi state asoshi konang bener arutsür asünung, iba amala asayar nem sorkari teyari agütsütsüla, ta ashi.

Football asayar kisüng masü saka danga discipline nunga tarutsü nung iba ama shilem agitettsü imlar, ta paisa ashi.

Sentong nung Nagaland Football Association tir aser All India Football Association nung

executive züngsem K Neibou Sekhose-i asayartem nem tenüngsang agüja liasü.

Asayar temi bendanga agütsüba aser meranga inyaka orr toktepa takok bener aruba atema pai pelaba ashi.

Nagaland Football Team (40+) iba asayamung nung shilem agiba osang President, Nagaland Football Coaches Association aser vice president, Nagaland Masters Games, Roko Angami aser president, KDFA, Mhasimhalie Matthew Yhome nati lemsatapa liasü.

Iba sentong nung menden ya women coordinator, KDFA, Dziesevinuo Yhoshü Lam liasü, Nagabazar Baptist Church nung deacon, Thepfuzakie Suohu-i sentong tenzüka sarasadem, aser KDFA finance secretary, Metekhrielie Mejura ajanga pela agizükba o jembia liasü.

Maneni Neilaü Thaprü-i temeja ken ka aten aser press secretary, KDFA, Medolenuo Ambrocia Loucü-i melepzüing o jembia liasü.

SAFF U16 Women's Championship: India-i Bhutan madak 7-0 agi akok

Kathmandu, Metsüremi/March 01 (Agencies): Anuksha Kumari-i goal asem agüja Hokulbarnü ANFA Complex nung SAFF U16 Women's Championship asayadang India-i Bhutan madak 7-0 agi akok.

Hazaribagh nungi arishi küm 13 tain Anuksha yagi sub-junior tire 1 nunga goal 22 agüja liasü aser lai Bhutan defence kanga junga nungboka ai aser Pearl Fernandes-ia goal ana,

Shveta Rani aser substitute Anwita Raghuraman nungeria goal ka-ka agüja liasü.

Asaya tetenzük nungi India tsürtem khenyongi balaka asayatet aser parnok midfielders aser forwards temi asayaba Bhutan teloki memenep.

Captain aser winger Shveta-i India asoshi mezüing goal agüja liasü.

Iba sülen minute 13 aser 27 tsüingta India nungeri goal pezü

agütsür liasü aser Fernandes-i goal pezü buba agütsüba ya iba asaya nung tajungtiba liasü.

Goa tsür Fernandes-i meta talang nungi metsüba ball ya goal post kinük leni ai aser Bhutan goalkeeper Kelzang Wangmo mangmanga liasü.

Iba asayamung nungya asayamung ayonger Nepal den Bhutan, Bangladesh aser India linüktemi shilem agir aser temaba team ana March 10 nü final asayatsü.

Beijing nung 2027 küm World Athletics Championships asayatsü

Tsüklai/Metsüremi/March 01 (Agencies) : 2027 küm World Athletics Championships Beijing nung ayongzüka asayatsü, ta track and field asaya achaayangba lokti tentet yagi sangdong ka ajanga metetdaksü.

Beijing nung iba asayamung ya tatamsa 2015 küm ayongzüka asayaogo aser China kübok Nanjing yimti nung taruba küm World Athletics Indoor

Championships ayongzüka asayatsü renema lir.

World Athletics tir Sebastian Coe-i ashiba agi, iba asayamung asayatsü atema Beijing shimba ya shilem kabo shishilembaba dak sendaka lir. Paisa, 2023 küm China nung Diamond League circuit broadcast asüba nungi million 368.9 aazüka liasü, ta ashi.

"China nung nütsüing yongsük billion 1.4 dak tema lir aser iba linük ya alima nung

sports market tulutiba rongnung ka lir," ta Coe-i ashi.

"Iba ya onok indang asaya renloka aotsü asoshi maongka tulu ka lir aser fan base ya alima nung commercial market tulutiba rongnung ka lir," ta paisa shisem.

World Athletics Championships tesüsabuba ya taoba küm August ita Budapest nung asayaogo aser 2025 küm iba asayamung Tokyo nung ayongzüka asayatsü.

STATE OSANG :

Tapak 2 nungi...

MLA Achumbemo-i state nung...

Ministry of Coal ajanga bendang lima nungi mijang tatakzük dang bener arutsü ozüing yangluba ajanga Nagaland nungi mijang agir timba akum aser iba yongji 2022-2023 nung revenue timba liasü, ta pai ashi.

Nagaland indang mijang timba agiba linük, Bangladesh nung January 2024 nung General Election agiba aser US aser Indonesia linüktem nungi jenjang talangba nung anguba mechi Nagaland mijang meshir ajema akum aser iba yongji 2023-2024 mapang revenue ajem, ta pai ashi.

Sorkari temelaba agütsür depots amenoktsü, rongsen peria aliba mijang atortem nem dang license agütsütsü aser GST magütsüba azüoktsü mechi jelia GST bookings alinung ajungtsü ta Minister, Tourism and Higher Education, Temjen Imna Along-i ashi.

Paisa state nung mijang atoba nungi timba ajangzüktsü aser kumdanga amshitsü atema Department-i capacity

building tenzüik nung ajungtsü ta pai ashi.

State nung ozüing agi melaba ama license 45 tashi agütsüogo saka mijang atoba maparen ozüing agi mela aliba ama mesüi inyaker, ta MLA Nuklutoshi-i ashi.

Paibo yimya shidak amshia mijang atotsü aser nüburttem aser state ajangzüktsü atema company tulutem bener arunung ajungtsü, ta ashi.

License alirtem ya 'open cast mining' ajanga mijang agizüktsü memelar aser sorkar indang guidelines sülen anidaksüla, ta Deputy Chief Minister, T. R. Zeliang-i nenshia ashi.

Mepetmesü adokba takotet nisung temi jangjatsü aser verification process mapang local MLA tem jaoktsü aser metongshitsütsü, ta pai ashi.

2014 küm nungi depot teshimtet amshia arur aser

royalty ya challan ajanga agütsütsü aser mijang ya transit pass ajanga dang abentsü, ta paisa ashi.

Home Department nung constable...

Candidate tem arishi küm 18 nungi 35 tsüingta asütsüla aser khen atema küm asem (3) tashi ajemtsütsü, anungji January 22, 2024 tashinung küm 38 alirtemi constable shimba nung shilem agitettsü, ta Patton-i ashi.

General category nungi candidate tem ya Class VIII pass sür alitsüla aser backward tribes nungi candidate tem Class VI pass

sür alitsüla. Physical/Medical standards kübok candidate tem ya Department-i latetja aliba 'predetermined standards and norms' tongtettsüla, ta Dy CM Patton-i ashi.

Iba recruitment ya tang aliba reservation policy nung majemdaksü saka nütsüing yongsük ratio ama tribal quotas nungi alitsü, ta Patton-i jangjashitsü.

DC & DEO Kohima aser EEM team...

DC & DEO-isa, EEM personnel tem dang ketdangsurtem dang parnok khuret kanga süoki ia agitsü ayongzük aser election takok ngua agitsü atema team balala den teka amteper inyakttsü mepeshia liasü. DC & DEO-i, election mapa atema shinga nema taitok magütsütsü ta nenshia metetdaksüogo.

Senden nungsa Election Expenditure Monitoring (EEM) atema District Nodal Officer, Deputy Registrar, Nagaland Cooperative Societies, Bokato Hesso-i election mapang EEM Team shilem aser tinyakttsü tatongi metetdakja liasü. Paisa, Election Seizure Management System (ESMS) App amshiyim

EEM personnel tem dang sayua liasü.

Iba senden ya Assistant Election Officer Kohima, Olivi Thurr lenisüba nung agi aser pai, EEM Team nung Assistant Expenditure Observers, Video Surveillance Team (VST), Video Viewing Team (VVT), Accounting Team, Flying Squad Team (FST), Static Surveillance Team (SST) densema lir aser Control Room ya election agitsüba anogo sangdongba nü nungi inyaksangshi tenzüker ta ashiba den election mapa lemzüka aliba ketdangsur ajak dang ECI guidelines dak ajemdaker parnok mapa inyakttsü ayongzüka liasü.

BILEMDANGANG

"Meranga meinyaki takar akümertemji kecha tenükshitsü mali."